

## E C S O D U S.

chéile seanairean Israeil, agus abair riu, Dh'fhoillsich an Tighearna Dia bhur n-aithreacha e féin dhomhsa, Dia Abrahaim, Isaaic, agus Iacoib, ag ràdh, Gu cinnteach dh'amhairc mi oirbh, agus *chunnaic mi* an ni a rinneadh oirbh 'san Eiphit.

17 Agus thubhairt mi, Bheir mi suas sibh a h-àmhghar na h-Eiphit, gu fearann nan Canaanach, agus nan Hiteach, agus nan Amorach, agus nam Peridfeach, agus nan Hibheach, agus nan Iebusach, gu fearann *a ta* fruthadh le bainne agus mil.

18 Agus éisdidh iadfan re d' ghuth: agus théid thu féin agus seanairean Israeil, gu rìgh na h-Eiphit, agus their sibh ris, Choinnich an Tighearna Dia nan Eabhruideach sinne: agus a nis leig dhuinn, guidheamaid ort, dol astar thri lathan do'n fhasach, chum as gu'n iobair sinn<sup>a</sup> do'n Tighearn ar Dia.

19 Agus is deimhin leam nach leig rìgh na h-Eiphit leibh imeachd, cha leig *eadhon* le làimh làdair<sup>b</sup>.

20 Agus sinidh mis' a mach mo làmh, agus buailidh mi 'n Eiphit le m' iongantasan uile, a ni mi 'n a meadhon: agus 'an déigh sin leigidh e dhuibh imeachd.

21 Agus bheir mise do'n t-sluagh so deagh-ghean<sup>c</sup> ann an sealladh nan Eiphiteach: agus tarlaidh, 'nuair a dh'fhalbhas sibh, nach falbh sibh fa-làmh;

22 Ach iarraidh gach bean<sup>d</sup>

o ban-choimhearfnaich, agus o'n mhnaoi a bhios air aoidheachd 'na tigh, feudan<sup>e</sup> airgid, agus feudan òir, agus eudach: agus cuiridh sibh *iad* air bhur mic, agus air bhur nigheanaibh; agus creachaidh sibh na h-Eiphitich.

### C A I B. IV.

**A**GUS fhreagair Maois, agus thubhairt e, Ach feuch, cha chreid iad mi, ni mò dh'éisdeas iad re m' ghuth: oir their iad, Cha do thaisbein<sup>s</sup> an Tighearn e féin dhuit.

2 Agus thubhairt an Tighearna ris, Ciod sin ann do làmh? Agus thubhairt efan, Slat.

3 Agus thubhairt e, Tilg air an làr i; agus thilg e air an làr i, agus rinneadh i 'na nathair: agus theich Maois roimpe.

4 Agus thubhairt an Tighearna re Maois, Cuir a mach do làmh, agus glac air a h-earr<sup>h</sup> i. Agus chuir e mach a làmh, agus rug e oirre, agus rinneadh slat dh'i 'na làmh.

5 Chum as gu'n creid iad gu'n d'fhoillsich an Tighearna Dia an aithreacha, Dia Abrahaim, Dia Isaaic, agus Dia Iacoib, e féin dhuit.

6 Agus thubhairt an Tighearn a thuill' air so ris, Cuir a nis do làmh a'd' bhroilleach; agus chuir e a làmh 'na bhroilleach: agus an uair a thug e mach i, feuch, bha a làmh lobhach mar shneachda.

7 Agus thubhairt e, Cuir do làmh a ris a'd' bhroilleach; agus chuir e làmh a ris 'na bhroilleach, agus thug e mach a bhroilleach.

<sup>a</sup> gu'n d'thoir sinn iobairt.

<sup>b</sup> ach le làmh làdair.

<sup>c</sup> fàbhor.

<sup>d</sup> iad.